

欽定大清會典事例

欽定大清會典事例卷四百四

禮部

風教

居

旌表節孝二

旌表累世同

嘉慶元年

諭畢沅奏本年二月內賊匪攻陷當陽縣城。有武生張鴻鍊之母陳氏。兄鴻鑑。嫂胡氏。朱氏。孀姊席張氏。俱經自縊殉難等語。張鴻鍊之母兄人等捐軀盡節。深堪憐憫。著畢沅照例題請旌表。以示軫卹。並著畢沅等查明有似此者。一體咨部議卹。○二年覆准。鑲黃旗蒙古聞散羅布藏索諾木之妻鄉君。係聞散

宗室宏晃之女。夫亡守節。與

旌表之例相符。給銀六十五兩。緞八疋。正藍旗閒散宗室甯俊之未婚妻瑚什哈哩氏。正黃旗滿洲親軍烏凌阿之妻。係原任奉國將軍宗室宗泰之女。各給銀三十五兩。緞二疋。並行文內閣。撰擬

敕諭各一道。褒獎。

盛京正黃旗閒散覺羅啟清德之妻伊爾根覺羅氏。閒散覺羅鄂起泰之妻李佳氏。鑲黃旗滿洲馬甲特克什克之妻。係閒散覺羅五福之女。正

黃旗滿洲護軍發福哩之妻。係聞散覺羅鳳德林之女。鑲紅旗滿洲拔貢覺羅圖敏之繼妻。鄭氏等。各給銀三十兩。緞一疋。均聽該本家自行建坊。其節孝祠內題名設位之處。行文工部。照定例遵行。○四年

諭。據保甯奏稱伊犁駐防滿洲錫伯綠營兵丁之孀婦內守節已屆年限者。請照內地一體旌表等語。所奏甚是。中外之人。皆係朕世僕。理宜一體施恩。著即照保甯所請行。但伊犁駐防索倫察哈爾額魯特回子部落人等。俱係牧處。其孀婦守節年限。未免難查。著

仍從其舊。如此內果有似索倫孀婦伯克木庫終身守節者。亦應旌表。以示朕一體加恩。各部落世僕之至意。○又覆准湖南省乾州水綏瀘溪澍浦保靖武陵等屬。被賊戕害之婦女等。各廳縣每處總建一坊。每坊給銀三十兩。交各該地方官支領。於通衢大路。擇地剋期建立。所有大小婦女姓氏。全行鐫刻於其上。仍將建坊日期報部。並令該督撫等隨時詳加查覈。毋許冒支冒銷。其冊內未載姓名者。均令詳悉查明。毋使一人湮沒。各該處節孝祠內。除婢女外。餘俱照例設位致祭。

○五年覆准。湖北省宜都縣民人婦女共一十八名。口被賊迫脅入夥。堅志不從。同時被害。義烈可嘉。照例

旌表。向例各省殉難紳士庶民。於本邑忠義孝弟祠內設位致祭。婦女於節孝祠內設位致祭。嗣後應分別定例。年屆十歲以上者。入祠設位。春秋致祭。其未及十歲者。均毋庸設位。○六年議准。八旗

旌表節婦成案。拘於年逾四十身故一語。至婦人二十歲以內守節至四十歲以內病故者。不能同

邀旌典。係屬誤會。例意。嗣後八旗及各省駐防。如有此等守節之婦。年未及四十。覈其守節。已歷十五年而身終者。一體咨部題請。○又議覆。江蘇省溧水縣人濮瓊之妻李氏。夫亡殉節。該氏平日與嫡妻徐氏和好。夙無間言。覈與嫡庶不睦。恐受正室陵虐。遽以身殉者。有間。可否一體

旌表奉

旨。李氏准其一體旌表。○七年

諭。據裕郡王亮煥奏稱。伊第三女尚未結褵。因聞伊壻

科爾沁二等台吉濟爾默特病故。情願前往夫家守貞等語。亮煥此女。本係庶出。例不應封。茲能如此堅持大義。立志守貞。殊屬可嘉。著加恩封為和碩格格。准其往科爾沁守貞。○又覆准。正紅旗間散宗室佛亨之妻趙佳氏。鑲紅旗宗室副管宗室宜孫之繼妻黃和爾氏。鑲紅旗間散宗室榮壽之妻王佳氏。正藍旗間散宗室德明阿之妻那拉氏。正白旗馬甲貴保之妻。係奉恩將軍謨本之女。鑲紅旗雲騎尉黑色之妻。係三等侍衛宗室德成額之女。



盛京鑲紅旗筆帖式恩成之妻。係奉國將軍旭英之女。夫亡守節。與

旌表定例相符。各給銀三十五兩。緞二疋。並行文內閣撰擬

敕諭各一道。褒獎。其正黃旗中書覺羅舒彌達之妻孟佳氏。給銀三十兩。緞一疋。均聽該本家自行建坊。其節孝祠內題名設位之處。行文工部照例遵行。○八年覆准。喀爾沁多羅貝勒丹巴多爾濟之祖母。係鎮國公宏昉之妹。聘與貝勒僧滾札普為妻。尚未婚娶。僧滾札普病故。情願過

門守節。乾隆七年奉

旨。賞給賢德和碩格格品級。今年八十歲。照例

旌表。由內閣撰擬

敕諭一道。褒獎。行文戶部。照郡主例頒發緞十二疋。並給銀八十五兩。聽本家自行建坊。○又覆准。鑲黃旗閒散端多克札木蘇之妻。係宗室宏珠之女。正紅旗閒散宗室班里布之妻佟佳氏。夫亡守節。與

旌表定例相符。應領銀兩緞疋。由戶部頒給。並行文內閣撰擬

敕諭各一道褒獎。餘照定例遵行。○又覆准。向例凡婦女強姦不從因而被殺者。皆予

旌表。其猝遭強暴。竟被姦汙。雖始終不屈。仍復見戕。則例不

旌表。揆情度理。不無偏枯。嗣後凡強姦已成。本婦被殺之案。如兇手在兩人以上。則顯係孱弱難支。當略其被汙之迹。原其抗節之心。應與強姦不從因而被殺者。一體

旌表。儻兇手僅止一人。則當詳究被姦之婦。有無捆縛情形。被殺之時。有無別生枝節。各省督撫於

題本內詳細聲敘。禮刑二部會同覈覆。應否准旌。隨案題明。請

旨定奪。再婦女被人調戲。羞忿自盡者。例得

旌表。至強姦已成。強徒業已遠颺。而該婦女銜冤茹憤。刻即捐軀者。應由各督撫一體詳悉聲明。禮刑二部覈實。年終彙題。照被人調戲羞忿自盡旌表之例。減半給予。儻死在越日。即行扣除。以示限制。○又奏。安徽省亳州捐職布政司理問何永澤之妾陳氏。山東省歷城縣生員范文煦之妾余氏。夫亡殉節。正室身故在先。可否一體

旌表奉

旨。陳氏等准其一體旌表。○又

諭。自邪匪滋事以來。三省官紳士民兵勇。有捐軀赴義者。均經給予恩卹。因念從前賊匪經過地方。婦女中或被賊迫脅。不從被戕。或逼近賊氛。完貞自盡。甚至有全家遇害者。俱堪憫惻。茲當大功告成。著該督撫即飭地方官據實詳查。必須確有指證可憑者。加結申報該督撫奏請旌表。一面開造清冊咨部覈辦。務期無濫無遺。以慰幽貞而崇節烈。○九年議覆廣東省遂溪縣民婦周氏。因被鄧咏貴等強行擄按

輪姦。該氏羞忿莫釋。即欲尋死。經伊父等勸慰  
防守。次日乘間自縊。覈其情節。死志已定。雖死  
在越日。實與立即捐軀者事同一例。可否准其  
旌表。給予減半建坊銀兩。奉

旨。周氏准其旌表。○又議准。四川省鹽亭縣民女王代  
定兒。因被楊泳年強姦已成。羞忿莫釋。即行投  
繯殞命。應予

旌表。並行令地方官給銀十五兩。聽本家自行建坊。  
○又奉

旨。顏檢奏審擬王濟衆圖姦李慕氏威逼致死一案。王

濟衆先經騙姦李杞元。後復因李杞元借貸不還。有心挾制。圖姦伊妻慕氏。以致慕氏情急投井身死。淫惡已極。不可一日姑容。王濟衆著即處斬。至李杞元因貪圖借貸。甘被羅姦。復聽從王濟衆圖姦伊妻。身為導引。以致慕氏窘辱。投井身死。猶復聽囑自認。不肯據實呈控。忍心無恥。莫此為甚。著即發往伊犁給予兵丁為奴。李慕氏被王濟衆擿按行強。設計脫身。捐軀明志。節烈可嘉。著照所請。准其建坊旌表。以維風化。○十一年覆准。直隸省烈婦范張氏。被伊姑屢次逼令賣姦。矢志不從。致毆烙受傷身死。應予

旌表。惟該氏夫家係屬土倡。汙鄙已甚。雖本夫恩義未絕。亦未便令其領銀承辦。自應令母家承領坊銀建造。其該縣節孝祠內設牌之處。仍照定例遵行。○十四年奏准。原任刑部尚書德福之妾王氏。自二十歲孀居。守節三十年。業經五十年。歲係例得請旌之人。惟例載守節之婦。應得旌表。如係孝義兼全。阨窮堪憫者。均給銀三十兩建坊。其止係循分守節者。給扁旌獎。至世族之家。貞節婦女。應否給銀建坊。例無專條。但該氏身為妾媵。分屬卑微。於伊夫病時。晝夜調護。廢寢



忘餐。迨夫病故。該氏年甫二十。並無所出。復能  
茹檠自甘。始終不渝。其艱貞之操。與寒苦守節  
者情事相同。應一體給銀建坊。

旌表。○十七年

諭。據曹師曾奏胞弟師程。聘原任協辦大學士尚書彭  
元瑞之女為妻。師程九歲病故。彭氏時年十二。矢志  
守貞。現年四十六歲。本年二月間呈報禮部請旌。部  
臣以年未五十。與例不符。議駁。可否懇恩俯賜旌表  
等語。彭氏未婚守節。甫在齠齡。即深明從一之義。禮  
部以年未五十。照例議駁。但覈其守節歲月。實已逾

三十餘年。艱貞自矢。歷久不渝。且彭元瑞曹秀先俱係一品大員。為江西望族。有此閨門節行之美。允宜及時褒獎。以彰風化。而式閭閻。該氏現櫻篤疾。著禮部速即題請旌表。以慰貞操。○又奉

旨。據鑲黃旗滿洲都統奏。原任公安祿之女許聘六品廕生徹靈多爾濟為妻。茲聞徹靈多爾濟病故。情願往夫家守節等語。安祿乃海蘭察之子。原係索倫。今伊女能知大義。情願守節。甚屬可嘉。著施恩加倍旌表。該部即行議奏。欽此。遵

旨。議准。原任公安祿之女毋庸拘常例年限。於例給銀

三十兩外再加銀二十兩。聽本家自行建坊。餘照定例遵辦。○十八年奏。宗室果齊斯歡之女。聞夫故情。願守節奉

旨。加恩旌表。毋庸拘常例年限。照例給銀三十兩。緞三尺。聽本家自行建坊。○又議准四川省開縣民張昭蓮之女。幼字黃天柱。尚未于歸。十四歲時。天柱出外貿易。聞翁姑患病。親往侍奉。及翁姑身故。該氏親為承服。苦守不字。業屆六十九歲。實屬孝義兼全。照例

旌表。○十九年

諭。上年逆首林清。勾結河南賊匪李文成等。約期九月十五日進京滋事。經滑縣知縣強克捷先期訪聞。俾林清李文成等失約敗謀。後先授首。實屬傑出良臣。功在社稷。且以身殉難。闔署被害者至三十餘人。深堪嘉憫。強克捷長媳徐氏。抗節不辱。挺身罵賊。致被活釘鬻割。拋棄遺骸。尤為可慘。著賜謚節烈。誥贈恭人。照例建坊旌表。在韓城縣為強克捷建立專祠。前層設強克捷牌位。後層設節烈恭人牌位。其從難之三十五人。俱分次設牌從祀。地方官春秋致祭。以慰忠貞。又

諭。皇后之胞叔明善。在刑部員外郎任內辦事認真。伊身故後。其妻覺羅氏於三日內殉節。實可嘉憫。明善著加恩追贈鴻臚寺卿。伊妻覺羅氏即以恭人例旌卹。又

諭。上年直隸山東河南三省毗連各州縣。猝遭匪徒滋事。紳民士女。不乏捐軀殉節之人。可見忠義之性。本乎人心。著各該督撫學政。飭屬查明。取具確實甘結。照例題請旌表。以示朕褒節維風之意。○二十年議准。

盛京正黃旗蒙古巴爾虎阿力沙郎之妻白氏。正

白旗蒙古巴爾虎達桑阿之妻富氏守節均與  
年例相符。照內地孀婦之例一體。

旌表。○二十一年議准。索倫達虎爾守節已屆年限  
孀婦。照伊犁駐防滿洲錫伯綠營兵丁孀婦之  
例一體。

旌表。○道光元年具題。山東省濟甯州民婦王于氏。  
痛夫情切。矢志投繯。事在奉。

旨禁止之後。可否

旌表。奉

旨。著加恩旌表。○又議准。陝西省石泉縣民女李招兒。

被客民張紹青強姦。即欲尋死。經伊父李達朝防範。迨伊父困倦睡熟。乘間投繯。雖死越多日。實與刻即捐軀無異。應予

旌表。○二年議准。鑲藍旗滿洲已故馬甲恩特赫之妻官圖氏。被家人造詞。汙蟻。氣忿自縊身死。應予

旌表。○又議准。江甯京口駐防鑲藍旗步甲岳興阿之女毛兒。被雙祥持刀嚇逼。強行姦汙。雙祥復張貼匿名揭帖。窘辱毛兒。以致羞忿自盡。應予旌表。照例給減半坊銀。停止設位。○三年議准。安徽

省廣德州元行軍千戶沈壽三之妻王氏。聞明兵克集慶路。夫以身殉。即赴尸所自盡。節烈堪嘉。照例

旌表。給銀建坊。於節孝祠內設位致祭。○四年議准。安徽省全椒縣民婦王楊氏守節十三年身故。按照成例。計少二年。應援已故貞女不拘年限之例。比照現存節婦二十年例限之半。定為守節十年。一體

旌表。○五年

諭。鄧廷楨奏續查從前殉節士民建祠請旌一摺。陝西



盤屋縣。嘉慶年間。邪匪滋事。及甯陝岐郿各案內。該縣士民婦女。不屈被戕者甚多。經該縣典史徐成燕訪查確實。商同該縣知縣白維清。創建祠宇。維持風化。著照所請。將該縣殉節貢生李培本等四千七百九十九名口。姓氏里居事實。宣付史館。照昭忠節孝等祠之例。每歲由地方官春秋致祭。其事蹟卓著之一百二十三起。著照例旌表。以崇忠孝而彰節義。該縣典史徐成燕。留心蒐訪。首先捐資倡建祠宇。甚屬可嘉。著加恩。以本省應升之缺儘先升用。以示鼓勵。

○又奉

旨。載銳之弟載鍾未婚妻原任知縣多齡額之女瓜爾佳氏。一聞夫故。情願守節。深知大義。甚屬可嘉。著毋庸拘常例。即予旌表。並給銀三十五兩。緞二疋。聽其自行建坊。著內閣撰擬敕諭一道。以示褒獎。其節孝祠內題名設位之處。交工部照例辦理。○七年議准。四川省劍州民婦小趙楊氏。被趙上誥調姦未成。即喊罵哭訴。經伊姑勸令和息。後一聞夫叔趙元祥埋怨。追悔抱忿。自縊身死。應予

旌表。○又覆准。江蘇省武進陽湖兩縣。自道光元年起。撙採貞孝節烈婦女共三千一十八口。該紳

士等購地捐建專祠。春秋致祭。補請。

旌表。應照總坊之例。給銀三十兩。於祠外總建一坊。以垂不朽。○八年議准。嗣後熱河承德府屬州縣。例應題請。

旌表之案。詳由熱河道轉呈都統。會同順天學政具題。有應行建坊等項銀兩。即由熱河道庫支發造報。○十一年覆准。安徽省懷遠縣民張步青之妻王氏。道光八年伊夫故時。年十六歲。矢以身殉。經伊祖姑勸慰。旋祖姑以老疾終。該氏悲痛益甚。為夫立嗣。值步青大祥之期。奠醊甫畢。

投繯殉節應子

旌表。○又議准。山東省歷城縣民女楊氏。因伊母楊  
吳氏被伊父楊立本斥罵。自縊身死。該民女痛  
母情切。捐軀自盡。照孝子例

旌表。○十三年奏准。貴州省古州。清江。丹江。均為化  
外生苗所居之地。以節孝著聞者。古州十一人。  
清江七人。丹江二十人。此內孝子二名。宣噶係  
昂垢寨蓄髮苗。賈香係背皎寨紫薑苗。節婦三  
口。扁招係桃繞寨黑苗。禾落及其媳曰噶係排  
卡寨紫薑苗。尤屬從來所未有。援照木平土司

甲勒參納木喀等之母節婦王氏之例。一體給予

旌表。○十五年議准。喀拉沁札薩克原任郡王端玉普色卜特恩之妻瑪佳氏。係正黃旗滿洲原任公特通額之女。過門守貞。年例相符。應予

旌表。○十八年議准。山東省曲阜縣四氏學節烈婦女孔王氏等六十七口。總建一坊。○又議准。江蘇省武進陽湖二縣。孝子蔡應陞等十三人。援照成案。給銀三十兩。總建一坊。○十九年議准。江蘇省通州分司所屬九場州誌及鹽誌。已故

貞烈節孝婦女居葛氏等三百三十八口。援照成案。給銀三十兩。總建一坊。○又奏准。多羅成郡王綿勲之九女。係奉

旨。指給鑲黃旗滿洲鑾儀衛治儀正敦愉之子聯智為妻。未婚。聯智病故。該王之女。過門守貞。奉

旨。封為貞節縣主。

欽賜貞壹性成扁額。道光十一年。奉

旨。將縣主交該王養贍。俟身故。仍附葬聯智塋地。以全苦節。今已身故。應予

旌表。○二十年。奏准。正紅旗滿洲護軍多倫泰之妻

宗室氏。被已革武生丁玉章穢語羞辱。氣忿自縊。應予

旌表。○又議准。四川省仁壽縣無名丐女。被丐民李在川強姦已成。受傷身死。照例

旌表。給予減半坊銀。停止祠內設位。○二十三年奏准。嗣後除宗室覺羅。及各直省烈婦烈女。並各州縣採訪彙建總坊照常辦理外。其由各直省彙題節婦一項。應由各省督撫。飭令該地方官確切訪查。詳悉區別。其實係阨窮者。給予坊銀。若僅止循分守節。照例給予扁額。建碑標題。不

得概請給銀建坊。及設位致祭。如查有謬誤捏飾。及書吏需索。致有遏抑浮冒等弊。即將該地方官交部議處。其在京八旗及各省駐防節婦。亦即照此辦理。若有循分守節。本家願另建坊者。仍聽其自建。以順輿情。至在部具呈者。應立限制。自七品實缺京官以上。確實聲明。委係何項親族。並註明居址地方。始准呈請。此外概不准具呈。其呈報到部。由部行查者。令各直省遵照定限。詳細聲覆。逾限即照例議處。合例者。仍由該督撫會同學政覈實具題。儻查有舉報不



實。即將舉報之員並出結官及該地方官。一併分別議處。○二十五年奏准。嗣後各省彙題節婦一項。查明隸何府州廳管轄。統計所屬節婦若干口。題准後。給銀三十兩。於各該府州廳內。官為總立一坊。毋庸按口給銀。○二十七年奉旨。禮部奏酌議旌表建坊章程等語。嗣後各該部隨案請旌之烈婦烈女。及年終彙題內之烈婦烈女。均著建立專坊。以示獎異。餘俱著歸入總坊。年終彙題。並著各該督撫等。題本內聲明彙建總坊字樣。用昭區別。○又奉

旨。禮部奏現在辦理旌表彙題。所有各省採訪之烈婦烈女。可否歸入總坊等語。著仍照向來採訪成案。歸入總坊。以符定制。○咸豐元年

諭。上年冬至以後。雪澤稀少。氣候頗形乾曠。入春來冷。暖不時。昨已節過春分。密霰凝寒。本日始放暄霽。朕念切民依。時時返躬內省。深恐措施未當。不能上感天和。去冬禮部彙題烈婦一本。朕以向來烈婦夫亡。無逼迫等情。遽行殉節者。例不准旌。雍正年間。

聖諭煌煌。原於維持風化之中。寓愛惜民命之意。並經內閣照例票擬雙籤呈進。遂用不必旌表之籤發下。

迄今事後追思。該烈婦等身殉其夫。舍生取義。究屬人所難能。而各省歲終彙題。不過二三十人。未必遽開輕生之漸。若給予旌表。亦足以激薄俗而勵綱常。所有上年禮部彙題各直省夫亡殉節之烈婦彭氏等三十七口。仍著准其一體旌表。以慰貞魂。○又奏准。各直省夫亡殉節之烈婦烈女。嗣後彙題本內。一體請

旨旌表。毋庸票擬雙籤。○又奏准。夫亡殉節之側室。嗣後彙題本內。一體請予

旌表。毋庸雙請。○又奏准。四川省穆坪土司堅參生

朗多吉之母包氏自二十八歲守節迄今五十  
二歲計守節二十五年照例

旌表令地方官給銀三十兩聽該土司自行建立專  
坊○三年覆准吉林甯古塔伯都訥三姓阿勒  
楚喀雙城堡六處節婦三十七名口改為建立  
總坊嗣後均照辦理○四年

諭向來建坊入祠之案例皆按年彙題由部覈覆未免  
往返需時所有各處紳民殺賊遇害既由各路統兵  
大臣及各該督撫查明著於該州縣申詳到時即行  
遵旨建坊入祠隨時咨部存案俾免稽延至有闔家

男婦同時殉難者。並准照總坊例。聽其自行另建一坊。以示表異。其婦女恐被玷辱。捐軀明志者。准其從祀節孝祠。以慰貞魂。○六年覆准。密雲駐防防禦都林布之女。痛夫殉難。過門守貞。毋庸拘守常例。即予

旌表。○十一年

諭給事中何璟奏請嚴懲勒索以彰節烈等語。軍興以來。各省殉難紳民婦女。無不立沛恩施。分別旌卹。據該給事中奏稱。粵東書吏門斗。積弊最深。婦女守節請旌。由禮部行查立限咨覆。遲至數年不報。竟有勒

索規費而後報者。似此勒押把持。實堪痛恨。著勞崇光者齡。嚴飭各州縣地方官教職等。查明紳民婦女義烈可嘉。及守節請旌者。如有勒押不報情弊。即將書吏門斗。嚴行懲辦。儻官為徇庇。亦即從嚴叅處。以儆貪邪而維風化。○又覆准江蘇省甘泉縣監生汪如松割臂療親。因傷殞命。應予

旌表。○同治元年

諭。毛鴻賓奏據同知銜趙景廉稟稱。伊姪服毒殉父。請旨旌獎等語。福建糧儲道趙景賢。在湖州本籍守城。城陷後尚無下落。茲據毛鴻賓奏該道之子趙深彥。

與伊叔趙景鷹在湖南道庫大使趙清彥任所。聞湖州於五月糧盡城陷。並風聞趙景賢殉難。趙深彥年甫十二歲。痛父情切。悲泣號咷。於六月初七日夜潛行服毒自盡。至性奇節。可嘉可憫。趙深彥著交禮部從優議給旌卹。以彰篤行。欽此。遵

旨議准。趙深彥孝烈可嘉。照例於原籍忠義孝弟祠內。設位題名。其應行建坊之處。從優行令地方官給銀建坊。以示旌獎。○又

諭。李續宜奏童年智烈。殺賊捐生。懇請旌卹一摺。咸豐七年間。賊犯安徽潛山縣。天堂巡檢馮焯之子馮福

基年十四歲。聞警匿母他所。身藏利刃。殺賊。為賊所獲。至湖北黃梅縣境。竊市肆藥。置飯裹中。毒斃賊匪十七人。亦自吞藥而死。馮福基以童稚之年。護母陷賊。用計毒殺兇黨多人。卒能從容就義。奇節至性。可嘉可憫。馮福基著交部從優給予旌卹。以彰風化。

又

諭前因嚴樹森奏伊高祖嚴時仁孝行純篤。請旨旌表。並懇賞給扁額。當交禮部查議具奏。茲據奏稱。嚴時仁孝行載在邑志。請照例旌表等語。嚴樹森高祖嚴時仁。著照所請建坊旌表。並著南書房翰林撰擬扁



額。賞給嚴樹森祇領懸挂。以彰潛德而慰孝思。○又  
覆准。嗣後如有實缺京官在部呈報節婦者。查  
係年例相符。由部先行覈准。統歸年終彙題。俟  
具題後。行知本籍。或寄居地方。准其自行建坊。  
仍隨時行查各該省。令地方官加具印結。確切  
聲覆。以備存案。其有不符之處。如係輾轉傳寫。  
偶然筆誤。無關弊竇者。一概毋論。如實係姓氏  
舛錯。存沒互歧。除將原案撤銷外。並將出結具  
呈之員。交部議處。儻承辦書吏。任意吹求。或稱  
所呈不實。或稱並無其人。一經發覺。將該地方

官照徇私例議處。以杜弊端。至在本籍呈請旌表者。仍照例由該督撫會同學政具題。並取具冊結送部。以符定制。○二年

諭。內閣侍讀學士劉有銘奏懇請旌表苦節一摺。據稱直隸靜海縣武生周世昌之女。自幼許配張桂蔭。因父母俱故。貧無所依。養於夫家。夫病久未合婚。病故後。該氏年甫十七。矢志不嫁。自食其力。於翁及祖翁姑。生養死葬。咸能盡禮。並撫夫之諸弟。均各成立。今於本年正月病故等語。周世昌之女張周氏。一生苦節。可憫可嘉。該學士籍隸直隸。見聞較確。著該部照

例旌表。以彰節孝。○三年議准。各省流寓紳民。有親友在原籍殉難。訪查確鑿者。准其將死事情形。在流寓地方。代為呈報。由該督撫咨行原籍地方督撫。轉飭查明。除例得請卹者。即行奏請議卹外。其餘應行旌表之男婦等。遵照咸豐四年奏准成案。先行分別入祠。題碑建坊。毋庸彙案題奏。仍隨時造具清冊。送部備查。至各省貞孝節烈婦女。應旌表者。該州縣取有供結。限一月內。徑詳督撫學政。會同具題。毋庸申報。府司轉詳。以期迅速。仍令各督撫隨時查覆。儻有因胥

吏需索以致逾限者。即照例將失察之員。隨本附叅。交部議處。其流寓他省之貞孝節烈婦女。應由寄居之地方州縣。詳加訪察。與土著之家。一律申詳督撫學政具題。仍取具冊結。開明原籍某省某縣。報部覈議。題准後。知照寄居省分。准其自行建坊。並行文原籍。歸入總坊。其已故者。設位節孝祠。○四年議准。湖南省永定縣孝子呂數孚。當七歲時。割股療母。髫齡至性。尚非立異沽名。應予

旌表。○五年

諭。都察院奏江西前署崇仁縣訓導蕭鶴齡之子文童蕭明瑤。於同治二年春間病故。伊妻劉氏吞金殉節。呈請旌表。並自行捐貲建坊之處。著該部議奏。嗣後各省赴該衙門呈請旌卹。如有似此情節。及割臂療疾等情。即著該衙門行知禮部。照例分別准駁。彙案具題。欽此。遵

旨議奏。江西烈婦蕭劉氏。應照定例。歸入年終彙案題請

旌表。至割股傷生。例不准旌。如有奏請旌表者。其入祠建坊之處。係請

旨遵行。嗣後有以割股療疾等情。赴都察院呈報者。俟知照到部時。由部於年終彙案分別准駁。奏

明請

旨。○七年覆准。嗣後除宗室滿漢為貞女請

旌聲明不拘常例年限。援案懇予

旌表外。所有由部題請

旌表。無論宗室滿漢。仍按照節婦年限扣算辦理。以

符禮經而崇定制。再嗣後有過門守貞。奉

特旨毋庸拘常例年限者。如未及十有五歲之時。即

由部存記。俟及笄後。再行辦理。○八年覆准。所

有題報節孝。除順天仍由學政主稿外。各省仍由督撫主稿。會同學政具題。均當循照舊章。以免歧異。各該州縣。於應行旌表節孝。取有供結者。限一月內。徑詳督撫學政。會同具題。逾限者。即將失察之員。隨本附叅。交部議處。至學政案臨所在。如有舉報節孝等事。亦應遵例覈實。隨時咨明督撫。會同辦理。不得希圖省事。意存推諉。○又覆准。兵燹之餘。祠宇牌坊。多未修復。嗣後府州縣衛。遵照定例。各建忠義孝弟祠一。祠內立石碑。節孝祠一。祠外建大坊。遇有殉難予

旌之件。隨案發交各屬。照例遵行。一俟建有碑坊。即照舊題名。以符定制。○十年覆准。嗣後孀婦守節至六年以上身故者。一體

旌表。其未及六年身故者。仍行扣除。○十一年

諭。李翰章王文韶奏節婦孝女同時自盡。請特賜旌表。並道員處置乖方。請旨革職各摺片。湖南已故知府李杏春。於咸豐五年。在湖北勦賊陣亡。該故員之妻朱氏。痛夫成瞽。矢志守節。其女娣貞。均經許字。立志不嫁。茹素求愈母目。李杏春之兄李光燦。向伊姪女勸解。強令開齋。娣貞等孝思純篤。堅執已志。李



朱氏因伊目失明。致誤二女終身。乘間自盡。婦貞娥。貞痛母情切。亦即自縊。殞命。一門節孝。深堪嘉憫。李朱氏並其女婦貞娥。貞。著交部一併照例旌表。貴州候補道李光燦。勸伊姪女開齋出嫁。操之過切。致釀三命。已屬咎無可辭。且事後復以李朱氏母女喫齋。入魔。自盡等情呈報。希圖掩飾。已過。居心尤為險詐。李光燦著即行革職。以示懲儆。○光緒二年議准。江蘇省金匱縣民女孫美娣。因伊父孫裕坤聽信費增三之言。主令另嫁。不允致死。應予

旌表。其建坊銀兩。比照翁姑逼嫁子婦例辦理。○又

奏准鑲紅旗滿洲烈婦巴郎氏。因夫故帶同幼子投水自盡。照夫亡殉節之例。一體

旌表。○四年

諭。向來各省遇有節孝可風。均准奏請旌表。此次直隸山西河南陝西各省罹此旱災。小民當飢困之際。忍死全親。舍身取義。尤屬可嘉。各該省儻有此等孝子順孫節烈婦女。事實確鑿者。各該督撫通飭各州縣。隨時採訪。彙案奏請旌表。以維風化。○七年奏准山西巡撫具題節孝貞烈婦女疏內。有他省節婦數十口。並非寄居山西者。題請

旌表。覈與例案不符。惟業經奏奉

恩准。敕部免其行查。自應欽遵辦理。嗣後不得援以  
為例。庶免轉轄而昭覈實。○又覆准。安徽省六  
安州烈婦熊程氏。於嘉慶十八年適儒童熊耕  
畬為室。越三年夫故。未生子女。繼長房明鑑為  
嗣。道光十六年。子已授室。該氏乃潛就夫墓自  
經死。揆諸則例所云孝義兼全者。洵屬無忝。是  
該氏原不必以烈著。應改照節婦

旌表之例辦理。○又覆准。嗣後實缺京官。遇有奉親  
不嫁。暨守節守貞等項。仍照例取具同鄉京官

印結赴部具呈。其餘割臂療親及烈婦殉夫兩項。並准其呈由都察院咨部覈辦。其在籍請旌者。如係殉難男婦。自應遵照舊例。先行建坊入祠。隨時咨部存案。至於貞孝節烈。仍照例由督撫學政會同具題。並造具事實冊結。送部覈議。除隨案請旌之烈婦烈女。仍隨時會同刑部具題外。其餘烈婦孝女。以及貞女節婦等項。仍照例歸於年終分別彙題彙奏。至各省採訪貞孝節烈等項。務覈其姓字里居。實有事蹟可憑。及年例已符者。方准題請。概不准僅憑稗官小說。

所記濫行列入。以昭慎重。○十一年覆准。嗣後遇有旌表案件。各直省督撫嚴飭各該州縣。以奉到部文之日。予限一月。一面遵照定例。分別給扁鐫碑。設位致祭。一面出示曉諭。如本家有願建坊者。聽其自便。將舉辦日期。按季摘由冊報督撫咨部。儻逾限不行舉辦。即由該督撫奏。照叢積公事例議處。督撫不行嚴叅。一律交部議處。○十二年。軍機大臣面奉

諭旨。御史慶祥奏請旌表節孝等語。嚴劉氏王康

氏李王氏均係直隸樂亭縣人。該御史以旗籍人員。為直隸民婦奏請旌表。雖據稱廬墓俱在該縣。究與同鄉官見聞較確。據實陳情之例不同。所請將嚴劉氏等旌表之處。著禮部議奏。欽此。遵

旨議奏。

旌表節孝。應由該督撫題請。其實缺京官在部具呈者。亦應聲明何項親族。並註明居趾地方。始能覈准彙題。仍行查原籍。以防冒濫。至京外臣工。不得呈請。

旌表。業經奏准通行。聞有奏奉

恩准者。係遵

旨辦理。並未著為定章。所有該節孝婦嚴劉氏等請旌之處。應由該地方官查明辦理。嗣後應

旌表各項。在外仍照例由該督撫題請。在內由同鄉七品以上實缺京官赴部具呈。由部照例辦理。所有滿漢內外臣工。概不得率行瀆請。以符定制。

旌表累世同居。○雍正二年覆准。湖廣省黃岡縣民鄧一隆。八世同居。家逾百口。閩門雍睦。給予建坊銀三十兩。表其坊曰八世同居之門。○十年

題准。湖南省沅江縣生員譙衿。七世同居。孝友敦篤。給建坊銀三十兩。於忠孝節義祠內題碑。並奉

特賜

御書世篤仁風四字。○又奉

旨。據陝西巡撫奏稱武功縣生員李倬。同州生員劉運。惇承家孝謹。七傳皆合族而居。懇請旌揚以光盛典等語。李倬劉運惇同居七世。敦睦可風。著照湖廣譙衿例。朕親書扁額頒賜。以示嘉獎。其建坊題碑之處。仍著照例行。



御書賜李倬敦睦可風四字。劉運惇敦本厚俗四字。○

乾隆二年題准。山西省翼城縣生員李煊。七世同居。給銀建坊。於忠孝節義祠內題碑。○十年題准。江南省桐城縣監生錢雲鳳。共爨百口。同居七世。應予

旌表。建坊題碑。與二年例同。○十六年題准。陝西省富平縣民韓文星。同居一十二世。共爨八十一人。華陰縣舉人李睿。聚族而居。一門八代。同堂共食五十二人。均予

旌表。建坊題碑。與十年例同。○十八年題准。福建省

漳州府貢生陳茂椿。六世同居。應予

旌表。建坊題碑。與十六年例同。○二十四年

諭。禮部議覆陝西巡撫鍾音題乾州民甯爾強一家雍睦。八世同居。應如所請。照例旌獎。民風淳厚。倫紀懋敦。朕用嘉慰。茲親製詩一章。並書扁額以賜。仍著加賞上用緞疋。用示優異。其給銀建坊題碑入祠之處。均如議行。○四十八年議准。陝西省長安縣民張洲。一門孝友。七世同居。令該撫轉飭該地方官。給銀三十兩。聽本家自行建坊。其忠義孝弟祠內。題名之處。照例遵行。○四十九年

諭。據何裕城奏。偃師縣民任天篤等。自伊四世祖任光玉至四世孫任瑞豐。九世同居。洵為邇治休徵。請旨旌表等語。任天篤家庭聚順。雍睦可風。宜推旌淑之恩。益廣型仁之化。茲親製詩一章。並書扁額以賜。其應賞給緞疋建坊旌表之處。該部照例具題。

御書義門敦族扁額。遵

旨覆准。令該撫轉飭地方官。給銀三十兩。聽本家自行建坊。其忠義孝弟祠內題名之處。照定例遵行。

至

恩賞緞疋。由內務府領出。交提塘齎送該撫。轉給祇領。

○五十年議准。陝西省大荔縣捐職州同李朝恩。七世同居。百有餘載。令該撫轉飭地方官。給銀建坊。其忠義孝弟祠內題名之處。照定例行。

○五十三年

諭。據雅德奏。侯官縣職員許王臣。自曾祖許友至伊曾孫同居七世。丁行百餘。洵為盛世。庶徵請旨。旌表等語。許王臣家庭聚順。雍睦可風。茲特親製詩章。御書扁額。以賜其應。賞給緞疋。建坊旌表之處。該部照例具奏。○又議准。江西省萬載縣民周耀德。六世同居。一門敦睦。照例

旌表。○五十四年

諭長麟秦商河縣武生白可任。八世同居。應請旌獎等語。白可任家門雍睦。子孫繁昌。累世同居。共敦親誼。允宜加恩褒獎。以為民俗儀型。著賞給御書扁額。所有應行旌表之處。該部察例具題。

御書義睦傳家扁額。○又

諭。茲據綿恩奏直隸永年縣生員喬庚辛呈明五世同居。伊父監生文源現年八十五歲等語。喬文源身列成均。年登耄耋。其子孫五世同居。洵為昇平人瑞盛事。喬文源著交直隸總督查明咨部酌量旌賞。以示

嘉惠敦睦至意。○又

諭。據梁肯堂奏河南魯山縣生員傅麟瑞七世同居。子孫一百五十餘人。懇請旌表等語。傅麟瑞一門式好。七世同居。子孫衆多。共敦妯睦。洵為盛世麻徵。特製詩章。並御書扁額以賜。所有應行旌表之處。著該部照例具題。

御書敦睦傳家扁額。○五十五年議准。山西省太平縣候選知府王協。闔家八十餘口。七世同居。照例旌表。轉飭地方官給銀三十兩。聽本家自行建坊。其忠義孝弟祠內題名之處。照定例遵行。○又

諭。據勒保奏甘肅固原州監生陳舜。十世同居。一門男婦大小一百三十餘人等語。陳舜合族同居。業經十世。兄弟歡愉。孫曾蕃衍。洵為盛世。旃徽。特製詩章。並書扁額以賜。所有應行旌表之處。該部照例具題。

御書聚順延祺扁額。○嘉慶十年題准。安徽省青陽縣監生王志江。七世同居。百丁合爨。照例

旌表。○十五年題准。河南省汝州從九品郭士培。七世同居。照例

旌表。賞給扁額。緞疋銀兩。○十七年題准。陝西省華州廩生張仲景。七世同居。照例

旌表。賞給扁額。緞疋銀兩。○咸豐九年議准。甘肅省  
武威縣生員王蓋臣。十二世同居。照例

旌表。



欽定大清會典事例卷四百五

禮部

風教

代

旌表百歲 五世同堂 親見七  
夫婦同登者壽 兄弟同登百歲

旌表百歲。康熙九年定。命婦孀居壽至百歲者。題

明給予貞壽之門扁額。建坊銀三十兩。○四十

二年覆准。老民年登百歲者。照例給予建坊銀

並給昇平人瑞扁額。老婦壽至百歲。建坊懸額。

與命婦同。○四十七年欽奉

恩詔。軍民老人。年自七十至九十以上者。照例賞給。其

至百歲者。題明給予建坊銀兩。○雍正四年

諭年屆一百一十八歲之人。實為希有。著於定例賜坊銀三十兩外。加增兩倍。共賞銀九十兩。嗣後年至一百一十歲。加一倍賞賜。至一百二十歲者。加兩倍賞賜。更有多得壽算者。按其壽算加增。著為定例。○乾隆元年題覆湖北省江夏縣壽民湯雲山。年屆一百三十一歲。照加倍賞賜之例。於坊銀三十兩外。再加三倍賞賜。共給一百二十兩。奉

旨。著加賞上用緞四疋。銀四十兩。○十一年題准。元年題旌一百三十一歲壽民湯雲山。又屆十年。閏年一百四十一歲。加賞銀三十兩。奉

旨。著賞給上用緞五疋。銀五十兩。再加息特賜扁額。以旌人瑞。欽此。遵。

旨由內閣撰擬。再閱古稀四字。頒賜。○十二年題准。原任內務府總管丁阜保。連閏。准作百歲。

恩賞朝衣一襲。上用緞十疋。銀千兩。給予期頤國瑞四字扁額。○十七年題准。廣東省惠來縣生員詹星斗。壽至百歲。照例。

旌表。奉。

旨。生員詹星斗。年屆期頤。實為膠庠人瑞。著加息給予國子監學正職銜。仍於常例外。賞給上用緞二疋。○

三十年

諭。朕恭奉

皇太后安輿巡幸江浙。塞輅所莅。宜廣

慈仁。以昭盛典。所有經過直隸山東二省之老民老婦。著照從前恩詔之例。賞賚。用示優老引年之意。○又諭。朕恭奉

皇太后安輿巡幸江浙。翠華所至。愷澤覃敷。而優恤高年。推恩宜渥。著將江南浙江二省男婦年七十以上者。俱照從前恩詔之例。一體賞給。以示恩賚。○又奉旨。此次接駕一百七歲之訓導王世芳。著賞給扁額。並

緞二疋。○三十五年

諭。國家熙洽化成。薄海共躋壽域。昇平人瑞。實應昌期。是以每歲直省題報老民老婦。年至百歲及百歲以上者。不可勝紀。因思向來所頒時憲書。後頁紀年。止載花甲一周為斷。殊不知周甲壽所常有。而三元之序。數本循環。成例拘墟。未為允協。著交欽天監。自乾隆三十六年辛卯為始。於一歲下添書六十一歲。仍依干支以次載至一百二十歲。則開表犁然。期頤並登正朔。用符紀歲授時之義。○三十六年

諭。章邱縣在籍州同高如峴。年逾九旬。孫曾繞膝。迎鑿

道左。洵為壽寓祥徵。著加恩賞給上用緞一疋。○又諭。濟甯州壽婦孫李氏。年躋百有二歲。著加恩賞緞二疋。○又題准。江西省興安縣生員李煒。乾隆三十五年。

特賜舉人。三十六年。

賞給國子監司業職銜。

御賜詩章。是年該員適屆百齡。照例給予建坊銀兩。並昇平人瑞字樣。○三十七年。

諭。原任興漢鎮總兵金梁之母楊氏。前呈代伊子謝恩時。年已九十一歲。曾批諭該督。俟至百歲再行奏聞。

今據勒爾謹奏楊氏現年已臻百歲等語。金梁之母楊氏壽屆期頤。精神矍鑠。允符上瑞。宜沛隆施。著加恩賞給御筆扁額。並上用緞六疋。豹皮十張。以昭壽世。引年之慶。其應建坊銀兩。該部仍照例行。○三十年。八年。覆准。嗣後各省舉報壽民壽婦。俱開實年。取具鄰族甘結。徑行呈報。該管州縣查明確實。遞詳督撫具題。由禮部照例辦理。毋庸由儒學轉牒。○四十三年。

諭。向來舉輅時巡。每優賜高年粟帛。以昭行慶。況盛京諸處。乃

祖宗德澤培貽。

累洽重熙。引恬引養。尤徵仁壽之庠。茲蹕路經行。多有  
年踰耄耄。龐眉皓首。扶杖歡迎者。宜沛恩膏。以彰盛  
美。所有奉天等處旗民男婦及官兵母妻七十以上  
者。各給布一疋。米五斗。八十以上者。給絹一疋。米一  
石。九十以上倍之。百歲者加賞大緞一疋。彭緞二疋。  
用示優老。引年至意。○四十五年

諭。四川阜和協副將馬詔蛟。前在軍營曾經出力。本日  
兵部將該員帶領引見。詢知伊母曾氏。年逾百齡。實  
為昇平人瑞。著加恩賞給御筆扁額。並上用緞四疋。



貂皮六張。用示優獎。仍令該員即速回任。侍養伊母。以昭朕加惠耆年之至意。欽此。尋頒

御書閻德耆年扁額。○又題准。福建省莆田縣郭鍾岳。

上年

特賜舉人。本年又

賞給進士。今年屆百歲。照例建坊。並給予昇平人瑞字樣。○又議准。浙江省仁和縣壽民魯文元。年一百三歲。海甯州壽民朱京昇。年一百二歲。武康縣壽民楊遇春。年一百一歲。照例

旌表。各給建坊銀三十兩。並昇平人瑞字樣。奉

旨。魯文元朱京昇楊遇春著加恩各賞給上用緞一疋。銀十兩。○又議准福建省上杭縣壽婦鄭邱氏年一百一歲。楊張氏年一百一歲。照例各給建坊銀三十兩。並貞壽之門字樣奉

旨。邱氏張氏著加恩各賞給上用緞一疋。銀十兩。○五十年

諭。何裕城奏陝西長安縣民孟世強現年一百一歲。世安耕鑿躬享遐齡。應請旌表等語。孟世強年逾百齡。精神矍鑠。素行淳良。洵屬昇平人瑞。著准其照例旌表。以示加惠耆齡之意。○又

諭。據劉秉恬奏雲南阿迷州民王國炎現年一百三歲。請旨旌表一摺。王國炎壽過期頤。孫曾繞膝。洵為昇平人瑞。宜加恩賚。用示寵榮。茲御書扁額以賜。其應賞給銀兩緞疋及建坊旌表。著該部照例具題。欽此。

尋頒

御書南弥垂彩扁額。○五十一年

諭。據特成額等奏湖北通城縣民吳添佑現年一百一歲。請旨旌表等語。吳添佑壽享期頤。孫曾繞膝。洵為昇平人瑞。其應行建坊旌表及賞給緞疋銀兩之處。著該部照例具題。○五十二年

諭。浦霖奏龍陽縣壽民萬銘。現年一百一歲。請旨旌表等語。萬銘年逾期頤。孫曾繞膝。洵為昇平人瑞。所有應行建坊旌表及加恩賞賚之處。著該部照例辦理。

○五十三年

諭。據保甯等奏稱。布魯特畢班壁特。伊母今年一百六歲。尚屬壯健。感激天恩。誠心恭祝萬壽。令伊稟知等語。布魯特畢班壁特之母。現年一百六歲。精神矍鑠。西域遠徼。共沐昇平上瑞。朕心深為欣慰。著施恩賞給大緞二疋。貂皮六張。伊子前來具稟。禮儀恭順。亦屬可嘉。並著賞給藍翎。以示朕優獎高年無閒內外。

至意。○五十四年

諭。福康安奏廣東新甯縣壽民李適本現年一百二歲。  
淳良謹厚。孝友可風。請旨旌表等語。李適本年逾期  
頤康強雙鍊。洵為昇平人瑞。所有應行旌表及賞給  
銀兩緞疋之處。著該部照例具題。用示優獎。耆年至  
意。○又

諭。惠齡奏江夏縣民吳國瑞現年一百二歲。孫曾繞膝。  
請旨旌表等語。吳國瑞年逾百齡。精神矍鑠。洵為昇  
平人瑞。特賜御製詩章。所有應行賞賚及建坊旌表  
之處。著該部照例具題。○五十五年

諭。梁肯堂等奏直隸提標左營兵丁程文亮之母陳氏。現年一百三歲等語。陳氏年逾期頤。精神強健。洵為昇平人瑞。其應行建坊旌表及賞給緞疋銀兩之處。著該部照例具題。○又

諭。據伍彌烏遜奏稱。阿爾臺烏梁海巴牙爾圖旗分老兵默多爾沁。現年一百三歲等語。默多爾沁年逾期頤。身體強健。壽祥遠屆蒙古部落。洵為昇平嘉瑞。著加恩交該部查例賞賚。○又

諭。據額勒春奏黃平州武生王嗣文。年一百一歲。四代同居。孫曾繞膝等語。王嗣文壽逾百齡。家風敦睦。澤

行後昆。實為熙朝盛事。所有應行賞賚及建坊旌表之處。該部查例具奏。○又議准。陝西省長安縣壽婦楊張氏。年一百二歲。照例給銀建坊。並由內務府支領緞一疋。銀十兩。頒給加賞。奉

旨。張氏著再加恩賞給緞一疋。銀十兩。○嘉慶二年

諭。據馮光熊奏。壽民年逾百齡一摺。婁士奎壽過期頤。康強矍鑠。洵屬熙朝人瑞。著即賞給六品頂戴。仍著該部照例旌表。以示朕優眷耆民。引年錫福至意。○

十四年奉

旨。禮部具題。原任直隸總督鄭大進之妻江氏。現年一

百歲請照例給銀建坊旌表一本。該氏係一品命婦。年屆頤齡。允屬熙朝人瑞。若與民間壽婦一體照常給賞。未免無所區別。嗣後遇滿漢三品以上文武大員之父母妻室。有年至百歲者。應如何從優賞賚之處。著禮部妥議具奏。所有鄭江氏應得恩賞。即照新例辦理。欽此。遵

旨議准。嗣後滿洲漢人。凡三品以上文武大員父母妻室。有年至百歲者。於例給坊銀三十兩外。請

旨加賞銀十兩。緞一疋。並以次推廣。凡有年逾百歲以上。及年屆百歲五世同堂。未屆百歲五世同



堂者。如係三品以上。均於平民常例之外。以次遞請加

賞銀十兩。緞一疋。至未屆百齡五世同堂者。向由各該衙門給扁。例無一定字樣。今三品以上。亦應與平民有別。請

敕交內閣。凡大臣命婦應得建坊給扁者。均另擬字樣。進呈

欽定。以昭優寵。○十五年

諭錢楷奏耆民年屆一百四十二歲。懇請旌表一摺。廣西宜山縣民人藍祥。壽逾百齡。飲和食德。終年倍行。

鮎顏喜見曾元。花甲再周。鶴算尤增歲月。洵難老之殊徵。亦寰區所罕觀。熙朝盛事。宜沛恩施。壽民藍祥。加恩賞給六品頂戴。並特頒御製詩章及扁額外。著禮部查照舊例加等擬賞具奏。以示惠錫敦龐至意。

○又奉

旨。廣西省壽民藍祥。著於加賞建坊銀一百五十兩外。再加賞銀五十兩。綬五疋。俱著於該省藩庫動用。發去御製詩章御筆扁額一併賞給。○道光元年題准。浙江省臨海縣耆民朱善庵。現年一百三歲。照例給銀建坊。並昇平人瑞字樣。奉

旨朱善庵著加恩賞給上用緞一疋。銀十兩。○又題准。河南省淮甯縣壽婦郭吳氏。現年一百一歲。照例給銀建坊。並貞壽之門字樣。奉

旨郭吳氏著加恩賞給上用緞一疋。銀十兩。○同治三年。題准。貴州省在籍總兵官林自清之祖母鮑氏。現年一百一歲。除照例給銀建坊外。請

旨敕交內閣另擬扁額字樣。進呈

欽定。加賞銀二十兩。緞二疋。○六年

諭。李鶴年奏命婦年逾九旬。請加賞賚等語。原任漕運總督袁甲三之母郭氏。年逾九旬。精神強固。允宜優

加賞賚。著南書房翰林恭書扁額一方。頒發祇領。以示殊榮。○十二年

諭。原任漕運總督袁甲三之母。現任詹事府詹事袁保恆之祖母郭氏。年屆百歲。精神強固。洵為熙朝人瑞。加恩賞給御書扁額一方。頒發祇領。以示殊榮。所有例應旌賞之處。仍著禮部覈議具奏。欽此。遵

旨議准。照例給銀建坊。並由內閣另擬字樣。進呈欽定。加賞銀十兩。緞一疋。○十三年

諭。軍機大臣工部尚書李鴻藻之母姚氏。年逾八旬。精神強固。著加恩賞給御書扁額一方。用示朕錫類推

恩至意。○光緒三年

諭。正白旗滿洲都統恭親王等奏大員之母年屆百齡一摺。吏部左侍郎恩承之母許氏年屆百齡。精神強固。洵為熙朝人瑞。加恩著南書房翰林書寫扁額一方賞給。以示殊榮。所有例應旌賞之處。仍著禮部覈議具奏。○九年

諭。前任甘肅肅州鎮總兵萬福。前在軍營。曾著勞績。咸豐年間開缺回旗。奉

旨賞食全俸。現在年屆百齡。精神強固。洵為熙朝人瑞。著加恩賞給頭品頂戴。所有例應旌表之處。仍著

禮部覈議具奏。

五世同堂。○乾隆五年題准。正黃旗壽婦索綽  
絡氏。壽屆百齡。居同九世。照例給銀六十兩建  
坊。並給予貞壽之門及五世同居字樣。○三十  
六年

諭。本日接駕之候選主簿張奎光。年躋九秩。五世一堂。  
式彰壽寓嘉瑞。著加恩賞給上用緞一疋。○四十五  
年

諭。據鄭大進奏襄陽縣民趙元寅。年一百十一歲。曾元  
五世。實屬昇平人瑞。照例請旌等語。趙元寅著照所

請。准其旌表。並於例應賞者。著加恩多賞一倍。再行加賞御筆扁額。用昭嘉獎。欽此。尋頒

御書期頤聚順扁額。○四十九年

諭。保甯奏四川達州民人張子翼。現年百歲。五世同堂。一指。張子翼壽享期頤。曾元繞膝。洵為昇平人瑞。著加恩。賚以示寵榮。茲親製詩章。御書扁額。以賜。其應賞給銀兩。緞疋。及建坊之處。著該部照例具題。欽此。

尋頒

御書頤齡衍慶扁額。○五十年

諭。朕仰承

天眷。上年喜得五世元孫。嘉慶駢臻。恩施宜渥。因令各省督撫查明所屬紳士庶民。有身及五代同堂者。加恩賞賚。茲據造冊咨送軍機處彙奏。共一百九十二戶。內郭有英張羽劉湘鍾君寵四人。俱壽逾百齡。曾元繞膝。洵為昇平人瑞。朕親製詩章。分賞四家。並各御書扁額以賜。用示寵榮。所有應賞銀兩緞疋及建坊之處。仍著該部照例具題。其未屆百齡五代同堂之張文聚等一百八十八人。並著各督撫分別年歲。給予扁額緞疋銀兩。以昭錫福。推恩同登。壽寓之至意。○五十二年



諭長麟奏德平縣壽民趙琳現年一百五歲五代同堂請旨旌表等語趙琳年逾期頤孫曾慶洽洵屬昇平人瑞特賜御製詩章御書扁額以示寵榮所有應行加恩賞賚及旌表之處仍著該部查例辦理○又

諭秦承恩奏白水縣壽民李淵本現年百歲精神矍鑠五世同堂請旨旌表等語李淵本年臻耄耄慶洽孫曾洵屬昇平人瑞所有應行建坊旌表加恩賞賚之處著該部照例具題○五十三年

諭畢沅奏獲嘉縣民婦徐汪氏現年一百八歲曾元繞膝五世一堂請旨旌表等語徐汪氏壽逾百齡慶延

五世。洵屬昇平人瑞。所有應行加恩賞賚及建坊旌表之處。著該部照例具題。○又

諭。據保甯奏。成都縣民劉萬迎。現年一百一歲。五世同堂。曾元繞膝。請旨旌表等語。劉萬迎壽逾期頤。慶延五世。洵屬昇平人瑞。特賜御書扁額。並親製詩章。以示寵榮。所有應行加恩賞賚及建坊旌表之處。仍著該部查例具題。欽此。尋頒

御書期頤行慶扁額。○又

諭。浦霖奏。善化縣民廖啟家。現年百歲。曾元繞膝。請旨旌表等語。廖啟家壽屆期頤。慶延五世。洵屬昇平人

瑞特賜御書扁額。並親製詩章。以示寵幸。所有應行加恩賞賚及建坊旌表之處。仍著該部查例辦理。欽此。尋頒

御書期頤行慶扁額。○五十四年

諭。何裕城奏甯都州生員曾鏡現年八十歲。五世同堂。可否給予扁額銀緞等語。曾鏡年臻八秩。五世同堂。實為昇平瑞應。著該撫給予扁額。並賞給緞疋銀兩。以昭錫福推恩至意。○五十五年

諭。何裕城奏安徽省原任翰林院庶吉士曹昞現任徽州府學教授呂韶監生張惇方秦耀祖者民姚一溥

余文章沈必可秦連如俱現年八十以上。五世同堂。請各賜予恩賚等語。曹炳等俱年臻耆艾。繞膝曾元。洵為昇平人瑞。所有應行加恩賞賚之處。著該部查例辦理。○又

諭。海甯奏神池縣知縣韓克鉉之父韓紹祖年七十一歲。五世同堂等語。韓紹祖年逾七旬。勸子服官。曾元繞膝。實為盛世嘉徵。所有應行賞賚及建坊旌表之處。著該部查例具奏。○又

諭。據何裕城奏安福縣知縣時本榮親父生員時舒安。現年八十四歲。精神矍鑠。五世同堂等語。時舒安就

養官署年逾八旬。曾元繞膝。實為熙朝嘉瑞。所有應行加恩賞賚之處。著該部查例辦理。○又

諭。前據綿恩奏清豐縣應試生員趙英。呈出伊祖生員趙峯。年八十四歲。五世同堂等語。趙峯身列膠庠。年臻耄耄。子孫五世同居。允為昇平人瑞。趙峯著加恩賞給舉人。准其一體會試。以示加惠耆齡至意。○又

諭。據徐嗣曾奏莆田縣民人朱天杜。現年九十六歲。曾孫十二人。生有元孫。五世同堂等語。朱天杜年近期頤。曾元繞膝。洵為盛世麻徵。所有應行加恩賞賚及建坊旌表之處。著該部查例辦理。欽此。遵照乾隆五

十年

諭旨。照例賞給扁額緞疋銀兩。但該壽民年近期頤。可  
否照百歲旌表之例。給予建坊銀兩。並昇平人  
瑞字樣奉

旨。朱天杜著加恩旌表。○又

諭。據孫士毅奏江津縣壽婦彭余氏。現年一百歲。五世  
同堂。請旨旌表等語。彭余氏壽臻百齡。曾元繞膝。洵  
為盛世麻徵。特賜御書扁額。以示恩錫。所有應加恩  
賞賚及建坊旌表之處。仍著該部查例辦理。欽此。尋

頒

御書貞世延祺扁額。又

諭。浦霖奏湘陰縣民周騰蛟現年一百一歲。五世同堂。請予旌表錫賚等語。周騰蛟期頤嬰鏢慶衍曾元洵屬盛世嘉徵。所有應行賞賚及建坊旌表之處。著該部查例具奏。○又

諭。據長麟奏曹縣民人吳世齊現年一百五歲。五世同堂。請旨旌表等語。吳世齊壽越期頤。曾元繞膝。洵為盛世庥徵。特賜御書扁額。並親製詩章。以昭榮寵。所有應行加恩賞賚及建坊旌表之處。著該部查例辦理。欽此。尋頒

御書頤登世行扁額。又

諭。據譚尚忠奏蒙自縣民楊添祿。現年百歲。一堂五世。請旨旌表等語。楊添祿壽屆期頤。曾元繞膝。洵為昇平人瑞。特賜御書扁額。並親製詩章。以昭榮寵。所有應行加恩賞賚及建坊旌表之處。仍著該部查例辦理。欽此。尋頒

御書頤壽鍾祥扁額。又

諭。據勒保奏秦州直隸州知州齊佳士。現年七十一歲。五世同堂等語。齊佳士七旬司牧。五世綿祥。洵仕籍所罕聞。實熙朝之盛事。特賜御書扁額。並親製詩章。



用昭褒異。所有應行加恩賞賚之處。仍著該部查例辦理。欽此。尋頒

御書保赤鍾祥扁額。又

諭。據姚棻奏德興縣民人傅元正。現年八十二歲。五世同堂。請旨照例錫賚等語。傅元正年臻耄耋。膝繞曾元。洵為盛世庥徵。所有應行加恩賞賚之處。著該部查例辦理。○又

諭。姚棻奏江西彭澤縣職員袁大正。現年八十一歲。五世同堂。請照例錫予恩賚等語。袁大正耄耋康強。曾元蕃衍。實為壽寓嘉徵。所有應行錫賚之處。著該部

查例具奏。○又

諭琅玕奏上虞縣壽民王瑞臣現年一百一歲。五世同堂。請予錫賚旌表等語。王瑞臣年逾期頤。曾元行澤。洵屬盛世嘉徵。所有應行賞賚及建坊旌表之處。著該部查例具奏。○又

諭託倫奏江西萬安縣民劉德懋。南昌縣民吳正英。萍鄉縣監生羅錫。高安縣武生丁昱。廣昌縣生員何裕。俱年逾期頤。五世同堂。請照例錫賚等語。劉德懋等艾壽康強。曾元行慶。洵為盛世嘉徵。所有應行賞賚之處。著該部查例具奏。○又

諭景安奏監生趙廣生老民賈三才雒文正等俱年登  
耄耄五世同堂請旨錫賚等語趙廣生賈三才雒文  
正等一門聚順繞膝曾元洵為昇平盛事所有應行  
賞賚之處著該部查例具奏○又

諭梁肯堂奏長垣縣耆民李之本現年九十三歲黃寶  
臣現年八十五歲俱五世同堂請予錫賚等語李之  
本等年逾耄耄慶衍曾元洵為昇平盛事所有應行  
賞賚之處著該部查例具奏○又

諭據穆和蘭奏尉氏縣民王從讓汜水縣民高寬孟縣  
民劉萬高俱五世同堂請照例錫賚等語王從讓高

寬劉萬高。俱年登耄耄。滕繞曾元。洵屬盛世麻徵。所有應行賞賚之處。著該部查例具奏。○又

諭琅玕奏耆民王茂源等。俱年臻八十以上。五世同堂。請旨錫予恩賚等語。王茂源錢奇俊葉瑞元王兆霖。俱年登耄耄。滕繞曾元。洵為盛世麻徵。所有應行賞賚之處。著該部照例辦理。○又

諭。浦霖奏湖南湘陰縣民胡先哲。生員顧尚傑。善化縣監生楊士彥。湘潭縣民胡錫蓮。醴陵縣監生易子範。監生張居閣。攸縣武生王命卿。城步縣民楊志宏。武陵縣舉人楊健。俱年屆八十以上。五世同堂。又善化

縣壽婦羅任氏。清水縣壽婦鄭王氏。安鄉縣壽婦張計氏。俱年躋百齡。亦五世同堂。請分別賞賚旌表等語。耆民胡先哲等。暨壽婦羅任氏等。雙鍊康強。門庭行慶。洵為昇平人瑞。所有應行賞賚及建坊旌表之處。著該部查例具奏。○又

諭。據保甯奏涪州生員甘克和。江津縣民趙永年。綿竹縣民王維祥。什邡縣貢生戴國相。西充縣民張積善。皆年逾耄耄。五世同堂等語。甘克和。趙永年。王維祥。戴國相。張積善。壽行者齡。澤綿後嗣。洵屬昇平人瑞。所有應行賞賚及建坊旌表之處。著該部查例具奏。

○又

諭書麟奏交城縣耆民武漁河。現年八十二歲。壽陽縣耆民任常慶。現年八十八歲。俱五世同堂。請錫予恩賚等語。武漁河等年逾八秩。慶行曾元。洵為熙朝盛事。所有應行賞賚之處。著該部查例具奏。○又

諭郭世勳奏廣東陸豐縣監生陳兆珠。現年八十歲。連州耆民蕭耀勝。現年九十五歲。俱五世同堂。請照例賞賚等語。耆士陳兆珠等年臻耄耄。膝繞曾元。洵為盛世嘉徵。所有應行賞賚之處。著該部查例具奏。○

又

諭畢沅奏湖北江夏縣職員萬廷模現年八十四歲通  
城縣壽婦全張氏現年八十五歲俱五世同堂請照  
例錫賚等語萬廷模等年逾八旬曾元行慶洵稱盛  
世嘉徵所有應行賞賚之處著該部查例具奏○又

諭海甯奏陽曲縣職員郭天隆現年八十五歲五世同  
堂請照例錫賚等語郭天隆者齡雙鍊膝繞曾元洵  
為壽寓嘉徵所有應行賞賚之處著該部查例辦理

○又

諭據周樽奏安徽涇縣貢生胡先榮監生查時世休甯  
縣耆民張之寬俱年登耄耄五世同堂請照例錫賚

等語。胡先榮等壽履康強。門庭行慶。洵為盛世嘉徵。所有應行賞賚之處。著該部查例具奏。○又

諭。福菘奏江蘇崇明縣耆民黃子榮。蕭縣耆民王怡。壹縣耆民許應召。俱年屆八十九以上。現俱五世同堂。請賞賚旌表等語。黃子榮等年躋耄耄。慶行家庭。洵為昇平人瑞。所有應行賞賚及建坊旌表之處。著該部查例具奏。○又

諭。伍拉納奏監生何大川。民人張維開。陳文通等。俱年屆九旬。五世同堂。請予賞賚等語。何大川。張維開。陳文通。均年屆耄耄。膝繞曾元。洵屬庶徵人瑞。所有應



行賞賚之處。著該部查例具奏。○又

諭朱珪奏旌德縣壽婦江吳氏現年一百歲。五世同堂。請予錫賚等語。江吳氏年屆期頤。曾元繞膝。洵為盛世麻徵。所有應行賞賚及建坊旌表之處。著該部查例具奏。○又

諭朱珪奏歙縣捐職府知事潘起煌。績溪縣耆民周瑞積。五世同堂。懇請恩賚等語。潘起煌等年逾八秩。繞膝曾元。洵為盛事。所有應行賞賚之處。著該部查照向例辦理。○又

諭朱珪奏旌德縣貢生朱麟書。五世一堂。請錫予恩賚

等語。朱麟書慶行曾元。洵為盛事。所有賞賚之處。著該部照例辦理。○又

諭。郭世勳奏博羅縣民湯干城年逾八十。身及五代。現有子孫六十餘人。共處一堂。請予錫賚等語。湯干城壽逾八秩。五世同堂。洵為昇平人瑞。所有應行賞賚之處。著該部查例具奏。○五十六年

諭。向來各省遇有壽民年逾百歲。及五世同堂。應行旌表賞賚之處。俱係照例具題。嗣因朕得有五代元孫。上年又係朕八旬壽辰。中外臣民同深歡忭。是以各督撫於所屬民人內。見有年登耄耄膝繞曾元者。具

摺入告。以為昇平盛事。然在上年奏報則可。此後仍當照例具題辦理。朕從不侈言祥瑞。崇尚虛文。總期時和年豐。天下共享盈寧之福。斯實為庥徵上瑞。如不過皓首龐眉。含飴衍慶。固屬閭閻佳事。而朕廑念黎元。時深願望者。實在彼而不在此也。嗣後各省有百歲耆民。及五世同堂等事。著各該督撫照例具題。給予旌表。不必專摺奏請。所有本日穆和蘭奏。汜水縣民李汝霖。封邱縣民張廷照。長麟奏銅山縣民王進公。福崧奏烏程縣民翁尚英。臨海縣民侯介福。瑞安縣民蔡次玉等。即著該部照例辦理。○六十年

諭。吉慶奏平陽縣民林世叨。現年九十五歲。五世同堂等語。林世叨年近期頤。曾元繞膝。實為昇平好事。特加賞大荷包一對。小荷包四箇。仍著該部照例給予扁額。用示加惠耆齡至意。○又

諭。朱珪奏翰林院檢討銜謝啟祚。現年一百二歲。視履從容等語。謝啟祚年逾百齡。精神矍鑠。曾元繞膝。五代同堂。洵為昇平人瑞。著加賞編修銜。御書扁額以賜。並賞給大荷包一對。小荷包四箇。所有應行建坊旌表之處。仍著該部照例辦理。○嘉慶十四年

諭。順天府尹宋鎔奏伊母王氏現年八十六歲。迎養在

京。五世同堂。謹據實奏聞等語。宋鎔之母王氏年逾八旬。家絲五世。承恩祿養。洵為盛世嘉祥。加恩特賜御書扁額一面。並賞大卷八絲緞二疋。小卷八絲緞二件。綾絹二件。綾三件。竹木漆陳設九件。以示恩渥。其例應賞賚之處。仍著原籍該撫循例具題。○二十一年奏准。刑部員外郎吳榮光之祖母易氏。五世同堂。照例。

旌表。○又奏准。國子監正白旗教習歐陽棻之祖母高氏。五世同堂。照例。

旌表。○二十五年議准。鑲黃旗祥保佐領下原任驍

騎校官德之妻卓多穆氏。五世同堂。雖該氏長子早卒。而現在第三子尚存。並非閒斷。仍照例旌表。○道光元年題准。浙江省永嘉縣貢生鄭希棟。年八十六歲。妻胡氏。年八十四歲。五世同堂。按照年歲給予扁額。並緞疋銀兩。○又題准。河南省襄城縣壽民耿紉。現年一百四歲。五世同堂。照例給銀建坊。並給予昇平人瑞字樣。奉

旨。著再加恩賞給上用緞一疋。銀十兩。○又題准。江西省新昌縣壽婦徐陳氏。現年一百一歲。五世同堂。照例給銀建坊。給予貞壽之門字樣。奉

旨著再加恩賞給上用緞一疋。銀十兩。○三年覆准。吉  
林原任佐領英保。暨妻張氏。夫婦五世同堂。除  
應得銀兩按照年例給發外。其扁額由部酌定。  
給予五世同堂字樣。○五年議准。原品休致給  
食全體副都統武登額。五世同堂。除例得緞疋  
銀兩。按照年歲給發外。至該員係三品以上大  
員。照例加賞銀十兩。緞一疋。扁額由內閣撰擬。  
俟

欽定後。交部頒發。○六年奉

旨。向例各省壽民壽婦。均係題請旌表。張師誠於涇縣

壽民潘廷譽。現年百歲。五世同堂。康紹鏞於安仁縣命婦歐陽周氏。現年八十一歲。五世同堂。均違例專摺入奏。殊屬不合。除由禮部行知該撫等。將系圖冊結補送外。張師誠康紹鏞俱著交部察議。嗣後各直省督撫。凡遇壽民請旌之案。著照例具題。以符定制。

○十一年覆准。江蘇省常州府通判饒霖之曾祖母張氏。繼嗣五世同堂。仍照例

旌表。○二十九年議准。原任河南巡撫姚祖同之妻吳氏。五世同堂。除例得緞疋銀兩。按照年歲給發外。該氏係三品以上命婦。照例加賞銀十兩。



緞一疋。扁額由內閣撰擬。俟

欽定後。交部頒發。○咸豐九年

諭。黑龍江原品休致副都統富勒洪額。年逾七十。五世同堂。洵為熙朝人瑞。除照例給予扁額銀緞外。著加恩賞給頭品頂戴。並加賞銀十兩。緞一疋。以示錫慶。引年至意。○光緒五年題准。四川省金堂縣壽民張益鼎。現年一百四歲。其妻曾氏。現年一百三歲。夫婦五世同堂。照例給銀三十兩。並建一坊。給予期頤偕老字樣。奉

旨。張益鼎曾氏。俱著再加恩賞給上用緞一疋。銀十

兩。○六年議准。貴州省貴陽府壽婦宋陳氏。係  
原任江蘇按察使宋劬毅之妻。年逾百歲。五世  
同堂。例得

旌表給銀建坊。扁額由內閣撰擬。俟

欽定後。交部頒發。仍照例加賞銀三十兩。緞三疋。

親見七代。○乾隆五十五年

諭。本年朕屆八旬開一。年穀順成。雨暘時若。壽辰之前  
夕。微雨飄灑。次日曦景晶瑩。天色開朗。太和翔洽。實  
為渥荷

天庥。十一日命皇子皇孫曾孫元孫等。山莊較射。元孫

戴錫年方八歲。五發三中。朕心深為喜悅。賜以黃褂。因憶昔年朕隨侍

皇祖山莊閱射。朕連中五矢。仰蒙

天語褒嘉。

慈顏大悅。蒙

賜黃褂。其時朕年十有二歲。今元孫甫及八齡。即能連發命中。仰見

昊蒼篤祐。

家法貽庥。慶澤延洪。克膺備福。現在八旬開表。元孫業已長成就傳。計朕壽躋九旬時。又可見六代來孫。同

堂稱慶。敬惟

鴻貺駢蕃。

貽謀悠遠。朕於感荷之餘。倍深兢業。不敢以景運增隆。稍存自足。惟有勵精宵旰。孜孜不怠。益務敬

天勤民。仰酬

恩佑。從前因誕育元孫。為史冊稀有盛事。曾命督撫等查明各省有五世同堂者。據實奏聞。特頒恩賚。今思朕逮事

皇祖

皇考。復得元孫。朕已親見七代。

篤慶錫光。更為古今罕有。著交八旗都統步軍統領順天府府尹及各直省督撫詳查臣民中。如有實曾親身上見祖父。下逮元孫。有指證者。據實奏聞。候朕優加恩賚。用昭壽寓同登之盛。○五十七年

諭朕仰蒙

昊眷。慶澤延洪。五代一堂。誕膺多福。因思朕逮事

皇祖

皇考。復得元孫。親見七代。實為古今罕有。前曾降旨令八旗都統步軍統領順天府府尹及各直省督撫詳查臣民中。如有實曾親身望見祖父。下逮元孫。有指

證者。據實奏聞。優加恩眷。茲當歲暮開韶。元正肇慶。節據內務府正白旗。查有致仕上駟院卿李質穎。並據馮光熊奏忻州監生張克用趙鈺。解州民人陳徽舜。交城縣民人武漁河。江蘭奏濟甯州原任雲南布政使李承鄴。朱珪奏歙縣捐職府知事潘起煌。均係上事祖父。下逮元孫。確有指證。並飭造系圖冊結咨部等語。李承鄴等年躋耄耄。或曾列卿寮。或安居葺屋。親見七代。五世同堂。實為昇平盛事。著加恩賞給七葉行祥扁額字樣。令該部及各該督撫製造頒給。用昭壽寓同登。敘時敷錫之盛。嗣後遇有續行奏到。

者。該部即照例索題。一體頒賞扁額。○又

諭。致仕上駟院卿李質穎。年逾八十。親見七代。五世同堂。實為熙朝盛事。除照例給予扁額外。著加恩賞給總管內務府大臣職銜。以示錫慶。引年至意。○嘉慶

元年欽奉

恩詔。各直省有同堂五世親見七代者。除例賞扁額外。查明各加恩賚。○六年題准。安徽省太平縣貢生崔必選。八十四歲。上事曾祖。下逮元孫。親見八代。五世同堂。除按照年歲賞給緞疋銀兩外。所有應給扁額。經禮部奏請

欽定奉

旨著賞給八葉衍祥字樣。○道光元年題准。浙江省永康縣壽民呂中清。九十二歲。親見七代。五世同堂。按照年歲賞給緞疋銀兩。並給予七葉衍祥字樣。○二年題准。廣東省嘉應州壽民林遵生。年一百歲。親見七代。五世同堂。照例給銀三十兩。自行建坊。給予昇平人瑞字樣。另行製造七葉衍祥扁額。給本家祇領。並請

旨賞給銀十兩。緞一疋。○三年題准。江西省吉水縣壽婦涂毛氏。年一百歲。親見七代。五世同堂。照例



給銀三十兩。自行建坊。給予貞壽之門字樣。另行製造七葉行祥扁額。給本家祇領。並請

旨賞給銀十兩。緞一疋。○四年題准。福建省永定縣壽民胡綸美。暨妻徐氏。俱年一百三歲。夫婦親見八代。五世同堂。照例給銀三十兩。自行建立一坊。給予期頤偕老字樣。另行製造八葉行祥扁額。給本家祇領。奉

旨。著再加恩。各賞給上用緞一疋。銀十兩。○二十六年議准。江蘇省通州封職沈猷。係前任兵部左侍郎沈岐之父。現年八十四歲。親見八代。五世同

堂。按照年歲給予扁額。賞給緞疋銀兩。並請

旨加賞銀十兩。緞一疋。扁額由內閣撰擬。俟

欽定後。交部頒發。○二十七年

諭。兵部尚書何汝霖奏伊母丁氏現年九十歲。迎養在京。五世同堂。親見七代。奏聞一摺。何汝霖之母丁氏年屆九旬。五世同堂。親見七代。承恩祿養。洵為盛世嘉祥。覽奏之餘。朕心實深欣悅。加恩特賜伊母御書扁額一面。福壽字各一方。如意一柄。大卷江紬四疋。大卷八絲緞四疋。以示恩渥。其例應賞賚之處。仍著原籍該督撫循例具題。○咸豐九年

諭。詹事府左中允。今降翰林院編修。恩吉。祖母劉氏。親見七代。五世同堂。經總管內務府據情代奏。著禮部照例辦理。○十年

諭。英桂奏壽婦年屆百歲。額懇恩榮。以彰人瑞一摺。山西太原鎮總兵田在田之曾祖母王氏。年逾百歲。五世同堂。親見七代。洵為熙朝人瑞。壽寓嘉祥。加恩著賞給御書扁額一面。以示恩榮。所有例應旌賞之處。仍著禮部覈議具奏。○同治十一年題准。廣東省赤溪協副將周鳳山。湖北省補用副將周岐山之母陳氏。現年一百一歲。親見七代。五世同堂。照

例

旌表扁額由內閣撰擬俟

欽定後。交部頒發。並請

旨加賞銀三十兩。緞三疋。○光緒九年

諭。原任廣東提督劉松山之母。現任通政使司通政使劉錦棠之祖母陳氏。年近八旬。親見七代。五世同堂。洵為熙朝人瑞。加恩著賞給御書扁額一方。頒發祇領。以示殊榮。所有例應旌賞之處。仍著禮部覈議具奏。

夫婦同登者壽。○乾隆二十六年題覆廣東省

南海縣民楊能啟。現年一百歲。伊妻黃氏。現年一百一歲。照例題請雙旌。並

欽定建坊字樣。奉

旨。壽民楊能啟。暨妻黃氏。百歲同臻。期頤偕老。允為熙朝人瑞。錫此嘉名。用式閭里。仍賜御製詩章。以示恩榮。而光旌典。並著賞給上用緞二疋。銀二十兩。○三十五年題覆。安徽省太湖縣壽民朱憲章。同妻劉氏。現年俱一百歲。例准

旌表。給銀建坊。並給予期頤偕老四字。奉

旨。壽民朱憲章。暨妻劉氏。百歲同臻。期頤偕老。允為熙

朝人瑞。錫此嘉名。用式閭里。仍賜御製詩章。以示恩榮。而光旌典。並著賞給緞二疋。銀二十兩。○四十五年。題履。安徽省亳州壽民陳洪如。現年一百六歲。妻王氏。年一百一歲。例准旌表。給銀建坊。並給予期頤偕老字樣。奉

旨。陳洪如王氏。俱著加恩。各賞上用緞一疋。銀十兩。夫婦並臻百歲。允屬熙朝上瑞。因御製詩章以賜。用示恩榮。而光旌典。○四十九年

諭。據農起奏。靈邱縣民劉榮妻王氏。現年一百二歲。劉榮年亦九十六歲。夫婦齊眉。孫曾繞膝。可否懇恩。雙

旌等語。劉榮夫婦年臻大耋。倡隨協慶。五世一堂。實為吉祥盛事。著加恩准其特予雙旌。用彰恩錫。以副朕加惠耆齡至意。○光緒十二年題准。廣東省香山縣壽民彭藻文。暨妻楊氏。現年均一百一歲。照例給銀。自行並建一坊。給予期頤偕老字樣。並再  
加恩各賞緞一疋。銀十兩。

兄弟同登百歲。○乾隆二十七年題准。山東省章邱縣壽民王欣然。現年一百三歲。伊弟王瑞然。現年一百歲。兄弟同臻百齡。請建坊

旌表奉

旨。王欣然王瑞然俱著加恩各賞給上用緞一疋。銀十兩。並給予熙朝雙瑞扁額。○五十五年

諭。胡季堂奏山東清平縣耆民張攻同弟張珩均年逾百齡。請照例旌表等語。張攻張珩昆弟隨肩。期頤矍鑠。洵俱為昇平人瑞。所有應行旌表及加恩賞賚之處。該部查例具題。○光緒九年題准。奉天府承德縣壽民樂宗榮現年一百三歲。其弟樂宗仁現年一百一歲。照例給銀。自行並建一坊。給予熙朝雙瑞字樣。並再



加恩各賞給綬一疋。銀十兩。